

*3 Dinge
Wat Jy Moet Weet*



Deur Pastoor Danie Nell

Drie dinge wat jy moet weet

(Hierdie boekje is vir mense wat 'n Christen geword het, of wil word)

*Past. Danie Nell
dnell@inetcom.co.za*

**Op Pinksterdag
het `n die skare wat in hul harte
getref was met die woord wat Petrus gebring
het, uitgeroep: "Wat moet ons doen, broeders?"**

**Petrus het in Hand. 2:38 soos volg
geantwoord:**

***"Bekeer julle, en laat elkeen van julle gedoop word
in die Naam van Jesus Christus tot vergewing van
sondes, en julle sal die gawe van die Heilige Gees
ontvang."***

**In Petrus se antwoord op hul vraag maak hy melding
van drie dinge:**

- **Dat `n mens tot bekering moet kom en sodoende
`n dissipel van Christus sal word.**
- **Dat `n mens daarna gedoop moet word.**
- **En dat so'n mens gevul moet word met die
Heilige Gees.**

***Ek praat dus met jou oor hierdie drie dinge wat
jy moet weet.***

Die Skrywer

DISSIPELSKAP

Die groot opdrag wat Christus gegee het aan Sy Kerk is:

“ Gaan dan heen, maak **dissipels** van al die nasies. . .
(Matt.28:19).

Het jy al ‘n dissipel van Jesus Christus geword ?

**WAT MOET DIE MENS DOEN OM ‘N DISSIPEL VAN CHRISTUS
TE WORD ?**

Die volgende:

- 1) Elke mens moet ten eerste beseft dat hy/sy ‘n sondaar is.
In **Rom. 3:23** lees ons dat almal gesondig het. Niemand kan dus sê dat hy geen sonde het nie.
- 2) Dan moet ons vergifnis van ons sonde kry deur dit aan Christus te bely.
In **1 Joh1:7,9** lees ons dat Jesus se bloed ons sal reinig van al ons sondes indien ons dit sal bely. (Om te bely meen om verskoning te vra)

**LET DAAROP WAT GOD MET ONS SONDES GEDOEN HET
NADAT HY DIT VERGEWE HET.**

Ps. 103:12 Die Here verwyder my sondes van my so vêr as die ooste is van die weste. (M.a.w. Jy sal dit nooit weer sien nie !)

Jes.44:22 Hy delg ons sondes uit soos ‘n wolk

Miga 7:19 Hy werp ons sondes in die dieptes van die see

Jer.31:34 God sal nooit weer aan ons sondes dink nie.

**AS GOD VERGEEF EN VERGEET HET, MOET EK DIT OOK
DOEN TEENOOR MYSELF**

- 3) Om Sy dissipel te wees moet ons Jesus aanneem as ons saligmaker en ander ook vertel dat ons dit gedoen het.
Joh.1:12; Rom.10:9,10.

Indien ons voorafgaande VERSTAAN én VAN HARTE GEDOEN HET is ons `n kind van die Here! Dan HET ons die ewige lewe.

1Joh.5:12,13: “Hy wat die Seun het, het die lewe; wie die Seun van God nie het nie, het nie die lewe nie. Dit het ek geskrywe aan julle wat glo in die Naam van die Seun van God, **sodat julle kan weet dat julle die ewige lewe het** en kan glo in die Naam van die Seun van God”.

En wat gebeur as ek weer sou sonde doen? Was alles dan tevergeefs?

NEE! In **1 Joh.2:1,2** lees ons dat ons as Christene nie moet sondig nie. Maar indien ons sou sondig moet ons weet dat ons Jesus het wat weer vir ons sal intree by ons hemelse Vader.

NOODWENDIG KAN JY VERVOLGING EN VERDRUKKING VERWAG, MAAR MOENIE SKAAM WEES OM CHRISTUS TE BELY NIE. (Mark.8:38)

Christus het nie sonskyn en rose vir Sy volgelinge beloof nie. Hy het inteendeel gesê dat daar selfs verdeeldheid in `n huis sal wees terwille van die evangelie. **Luk.12:51-53:**

En in **Joh.16:33** sê Jesus “In die wêreld sal julle verdrukking hê; maar hou goeie moed, Ek het die wêreld oorwin.”

In **2 Tim.3:12** lees ons: “En almal wat ook godvrugtig wil lewe in Christus Jesus, sal vervolgd word.”

Hoekom praat ons van “Dissipelskap”

Omdat dit die taal is wat die Bybel gebruik. **Matt.28:19:** “Gaan dan heen, maak dissipels van al die nasies . . .”

Luk.11:1: “En toe Hy (Jesus) op `n sekere plek besig was om te bid, sê een van sy dissipels vir Hom nadat Hy opgehou het: “Here, leer ons bid soos Johannes ook sy dissipels geleer het”.

Hand.14:21 “En nadat hulle aan daardie stad die evangelie verkondig en `n aantal dissipels gemaak het, het hulle teruggegaan na Listre en Ikónium en Antiochië”.

In Antiochië was die dissipels vir die eerste keer christene genoem. **Hand.11:26.**

Daar is 4 basiese beginsels van dissipelskap:

1. **Luk:9:23:** “En Hy sê vir almal: As iemand agter My aan wil kom, moet hy homself verloën, en sy kruis **elke dag** opneem en My volg” (Matt.16:24; Mark.8:34,38)

Selfverloëning beteken om van myself niks te maak nie; en dit elke dag. Dit beteken ook selfkruisiging met Christus.

Gal.2:20; Rom.6:5,6;

2. **Joh.15:8:** “Hierin is my Vader verheerlik, dat julle veel vrug dra; en julle sal my dissipels wees”.

Die ware dissipel dra vrug. Dra die vrug volgens **Gal.5:22**.

Die Lewende Bybel stel Gal.5:22 soos volg: “Maar as dit die Heilige Gees is wat ons lewe oorheers, bewerk Hy die goeie dinge in ons soos die vrugte wat aan `n boom gedra word. Hy gee liefde, blydschap, vrede, geduld, vriendelikheid, vrygewigheid, betroubaarheid, nederigheid en selfbeheersing”.

3. **Joh.8:31:** “En Jesus sê vir die Jode wat in Hom geglo het: As julle in my woord bly, is julle waarlik my dissipels”

Ons kan vra net wat ons wil, en dit ook verwag indien ons toelaat dat Sy woord in ons bly en ons in Sy wil bly. **Joh.15:7**.

`n Ware dissipel **doen** wat die woord van die Here vir hom sê, ongeag die opinie van enige mens.

4. **Luk.14:26-35:** Lees die gedeelte in jou Bybel. Om gered te word kos niks! (Jes.55:1) Maar om `n ware dissipel te word kos baie

Die woordjie “**haat**” in Luk. 14 beteken om “**minder lief te hê**”.

Die woordjie “**haat**” in **Luk.14** is nie `n goeie vertaling nie, want God verwag dat ek my ouers sal liefhê en ook sal eer. **Ef.6:2,3;** “Eer jou vader en jou moeder dit is die eerste gebod met `n belofte – sodat dit met jou goed mag gaan en jy lank mag lewe op die aarde.”

Maar wat Jesus vir ons in **Luk.14:26** wil leer is: Ek moet my moeder en my vader, my vrou, my kinders en selfs my eie lewe minder liefhê as vir God.

Luk.14:26 Word in die Lewende Bybel soos volg vertaal:

“`n Mens kan nie na My toe kom en my volgeling wees as hy nie gewillig is om af te sien van sy pa, ma sy vrou en kinders, sy broers en susters en selfs ook sy eie lewe nie”.

In **Rom.9:13** staan geskrywe: “Jakob het ek liefgehad en Esau het ek gehaat”.

Ons moet verwag van God dat Hy dié wat Hom nie opreg dien nie minder sal liefhê as vir die wat Hom met hul hele hart soek.

En wat van my besittings? (Lukas 14 vers 33).

My besittings mag my nie besit nie. Dit beteken ek mag nie `n slaaf van my besittings wees nie. Dit is nie sonde om sekere dinge te besit nie, maar dit is `n sonde as die dinge oor my heers.

Die ware dissipel is bereid om homself te verneder en die “eie ek” te kruisig. Paulus verwys nie hierdie “kruisiging” in **Gal.2:20**.

`n Slot Woord:

Hoe jammer dat daar vandag baie ‘**geheime dissipels**’ is **Joh.12:42; Joh.19:38; Joh.7:13**.

Wat sal `n bruidegom maak as sy bruid sê: “Ek sal jou bruid wees maar in die geheim; niemand moet daarvan weet nie?” So `n verhouding sou niks werd wees nie.

Die wat nie `n dissipel van Christus wil wees nie sal sy/haar smaak as sout verloor en sal onbruikbaar word. Luk.14:34,35; Dink aan Lot se vrou!

Ek moedig jou aan om `n toegewyde dissipel (volgeling) van Christus te wees.

DIE DOOP VAN DIE GELOWIGE

Die eerste opdrag in Matt.28:19 is: “Gaan maak dissipels” maar daar is ook `n tweede opdrag, naamlik die doop, en daarna moet ons kyk.

Nadat ons ons sondes bely het en Jesus aangeneem het as ons persoonlike Saligmaker, is die volgende stap om gedoop te word volgens die opdrag in die Skrif.

Laat ons saam die DIE DOOP teks vir teks nagaan, en besluit dan om aan God gehoorsaam te wees.

Indien jy nog nie die doop van die Gelowiges ondergaan het nie; word vertrou dat jy Jesus ook sal volg deur die doopwater. Indien jy wel gedoop is, word vertrou dat die studie hiervan jou sal inspireer om ander gelowiges te help dat hulle ook gedoop sal word.

DIE DOOP TEKS VIR TEKS BEHANDEL: (Lees self in jou Bybel)

1. **Matt.3:11** – Die woorde “met water” verwys nie na die metode van doop nie, maar na die element wat gebruik word, naamlik water. M.a.w. `n Mens gebruik water om mee te doop.
2. **Matt.3:13-17** - So is Jesus op dertigjarige leeftyd (Luk.3:23) in die Jordaanrivier deur Johannes die doper gedoop!
Let op die woorde: “uit die water opgeklim (gekom)” wat tog sekerlik aandui dat Jesus wel in die water was. Jesus was in die water sodat Johannes die doper Hom deur onderdompeling kon doop, anders wat sou die nut vir Jesus gewees het om in die water te gaan indien Hy byvoorbeeld net besprinkel sou word?
3. **Matt.28:19** – Hier staan nie dat die “nasies” gedoop moet word nie, maar die dissipels wat gemaak word uit die nasies.

`n Mens moet eers `n dissipel (volgeling) van Jesus word voordat hy gedoop kan word in die Naam van die Vader en die Seun en die Heilige Gees.

4. **Mark.16:16** – Hierdie was die laaste boodskap van Jesus voordat Hy opgevaar het na die hemel – Dit bevestig die belangrikheid van die doop. ‘n Mens sal tog alleenlik die belangrikste dinge sê voordat jy hierdie aarde sou verlaat ?

Daar moet beslis eers geloof in Christus in ons hart wees voordat ons gedoop kan word Filippus het ook seker gemaak dat die hofdienaar glo met sy hele hart voordat hy hom gedoop het (Hand. 8:37).

Omdat geloof in ‘n baba se lewe ontbreek, kan ‘n baba nie gedoop word nie. Wat gebeur indien ‘n baba sou sterwe sonder dat hy/sy gedoop is, sal so ‘n baba nie verlore gaan nie ? Nee, volgens Mark.10:14 behoort die koninkryk van God aan hulle.

5. **Luk.7:29-30** – Johannes het baie water benodig om te doop omdat doop deur onderdompeling geskied. Dit is dan ook die rede waarom die mense na Enon naby Salim moes gaan om gedoop te word, aangesien daar genoegsame water was. Vandag is dit nog so dat daar baie water benodig word om die mens deur onderdompeling te doop.
6. **Hand.2:38-39** - Die mens moet eers tot bekering kom voordat hy gedoop word. Die doop is ‘n duidelike BEVEL, soos wat Petrus dit gee in vers 38. Maar die doping met die Heilige Gees is ‘n BELOFTE, daarom verwys die belofte in vers 39 dan ook na die doping met die Heilige Gees. In Hand. 1:4,5 word melding gemaak van hierdie belofte, naamlik die HEILIGE GEES.
7. **Hand.8:12** - Net die manne en vroue wat geglo het is gedoop.
8. **Hand.8:35-39** - Doper sowel as dopeling was IN die water. Hoekom? Omdat dit nodig is vir die dooper om saam met die dopeling in die water te wees sodat laasgenoemde onderdompel kan word Filippus en die hofdienaar sou tog sekerlik nie ‘n deel van hul liggeme natgemaak het net om ‘n paar druppels water op die hofdienaar se hoof te plaas nie.

Dit is ondenkbaar dat die hofmeester die lang reis in die woestyn tussen Jerussaleem en Noord Afrika (Ethiopië – Hand.8:27) sou aandurf sonder water by hom. Filippus het nie sy drinkwater gebruik om te doop nie, omdat doop nie besprinkeling is nie

9. **Hand.10:44-48** - Cornelius en sy mense was gelowiges wat gevul is met die Heilige Gees en het in tale gepraat. Volgens Petrus het hul dus gekwalifiseer vir die waterdoop.
10. **Rom.6:3-4** - Die doop stel `n geestelike begrafnis voor; en om te begrawe meen om te bedek.
Deur onderdompeling ondergaan ons `n “geestelike begrafnis” om daarna in `n nuwe lewe opgewek te word.
`n Mens sal tog nie met `n paar sandkorrels iemand begrawe nie.
11. **Ef.4:5** - “een Here, een geloof, een doop” Ons glo dat daar net een Here is. Ook dat daar net een ware geloof is en dit is in die ewige God. Hoe kan ons dan glo in meer as een ware doop?
12. **Kol.2:11-12** - Die doop het nie in die plek van die besnydenis gekom nie, aangesien hierdie besnydenis verwys na “`n besnydenis wat nie met hande verrig word nie” Die besnydenis van die hart, verwys na bekering. (Vergelyk Deut.10:16; Deut.30:6; Jer.4:4; Rom.2:28-29).

Die besnydenis was vir Israel en net vir die manlike geslag! (Gen.17:10). Indien die doop in die plek van die besnydenis gekom het, kan net seuns gedoop word.
13. **1 Kor.1:17** - Laat ons hierdie teks nie verkeerd verstaan nie, want die doop is wel `n deel van die evangelie, maar omdat daar verdeeldheid was onder die Korinthiërs, het Paulus hierdie woorde aan hulle geskryf.
(Lees die vorige verse om dit beter te verstaan - verse 10-16).

Paulus het beslis doop gepreek en self ook gedoop.
(Hand.16:10-15 en 30-33 asook Hand.18:8).

14. **1 Pet.3:18-21** - “Want Christus het ook eenmaal vir die sonde gely, Hy die Regverdige vir die onregverdiges, om ons tot God te bring. Hy wat wel gedood is na die vlees, maar lewend gemaak deur die Gees: in wie Hy ook heen gegaan en gepreek het vir die geeste in die gevangenis, wat eertyds ongehoorsaam was toe die lankmoedigheid van God eenmaal gewag het in die dae van Noag onderwyl die ark gereed gemaak is, waarin weinig, dit is agt siele deur water heen gered is; WAARVAN DIE TEËBEELD, DIE DOOP, ONS NOU OOK RED, NIE AS `N AFLEGGING VAN DIE VUILHEID VAN DIE VLEES NIE, MAAR AS `N BEDE TOT GOD OM `N GOEIE GEWETE - DEUR DIE OPSTANDING VAN JESUS CHRISTUS.”

In die Ou Testament het die ark 8 mense gered. Volgens die Nuwe Testament sal elkeen wat glo en hom laat doop ook gered word. **Mark.16:16**

Geen wonder dat die Fariseërs en Saduseërs gedoop wou word nie. Hulle het bang geword dat God se oordele hul sou tref indien hulle nie gedoop is nie. (Matt.3:7-8)

`n Uitdaging word aan elkeen wat in Christus glo gestel, naamlik:

“LAAT JOU DOOP SODAT JY `N GOEIE GEWETE VOOR GOD KAN HÊ!”

DIE DOPING MET DIE HEILIGE GEES

Petrus het op pinksterdag aan die skare gesê” **Hand.2:38** – “Bekeer julle, en laat elkeen van julle gedoop word in die Naam van Jesus Christus tot vergewing van sondes en julle sal die gawe van die Heilige Gees ontvang”. In vers 39 sê Petrus dat die belofte van die Heilige Gees vir ons almal is.

Het jy al die Heilige Gees ontvang?

Iemand vra: Maar het ek nie die Heilige Gees ontvang by my bekering nie? Ons antwoord: Ja, by bekering het jy seker die Heilige Gees, want dit is tog die Gees wat jou oortuig het van sonde (Joh.16:8) en dit is die Gees wat jou lei en met jou gees getuig dat jy Sy kind is. (Rom.8:14,16)

Maar by die doping met die Heilige Gees het die Gees vir jou !

DIE DOPING MET DIE HEILIGE GEES

- 1. Die doping met die Heilige Gees is `n belofte vir elke kind van God ... nie een word uitgesonder nie, want God is geen aannemer van die persoon nie.**

Volgens **Matt.3:11** is Jesus is dus die dooper met die Heilige Gees. (Vergelyk ook Luk.3:16):

Soos wat Jesus Homself oorgegee het aan Johannes die dooper om in die Jordaan rivier gedoop te word, so moet jy jouself oorgee aan Jesus sodat Hy jou kan doop in die stroom van “lewende water”

Kind van God! Dink jy dan dat Hy jou sal vergeet?

Nee, die belofte van die doping met die Heilige Gees is ook vir ons wat vêr was. (**Hand.2:39**).

- 2. Wat was die ondervinding van diegene van wie ons in die Skrif lees, wat met die Heilige Gees gedoop was?**

- a) Hand. 2:1-4**

Dié wat gevul was met die Heilige Gees op Pinksterdag het in ander tale gespreek, soos die Gees aan hulle gegee het om uit te spreek, (Hand. 2:4) en het krag en vrymoedigheid ondervind. Kyk bv. Na Petrus (Hand. 2 :14). Eers was hy skaam en het in die binneplaas van die paleis Jesus verloën maar nou is hy bang vir niks en niemand nie; omdat hy vol is van die Heilige Gees.

Hier word `n hele aantal verskillende dialekte genoem wat deur die gawe van tale geopereer het soos die Heilige Gees dit gegee het om uit te spreek. Die spreke in tale dien as `n teken vir die ongelowige (**1Kor.14: 22**).

Op pinksterdag het die mense uitgeroep:
“Wat kan dit tog wees?” (**Hand.2:12**).

Petrus het in Aramees, die verstaanbare taal van die tyd, aan die skare God se boodskap oorgedra, en verduidelik wat plaasgevind het. (**Hand.2:14-18**).

- b) **Hand.4:31** Hier is die dissipels weer vervul met die Heilige Gees en die uitwerking was dat hulle die woord van God met vrymoedigheid verkondig het.
- c) **Hand.10:44-46** Toe Cornelius en sy mense gedoop word met die Heilige Gees het hulle net soos die dissipels op Pinksterdag, in tale gespreek en God groot gemaak. Deur die eeue heen was dit nog altyd dieselfde ondervinding.
- d) **Hand.19:6** “En Paulus het hulle die hande opgelê, en die Heilige Gees het op hulle gekom, en hulle het met tale gespreek en geprofeteer”.
NOTA: Dit is dus baie duidelik dat die eerste teken dat ‘n mens gedoop is met die Heilige Gees die spreking in ander tale sal wees. Ja, ander tekens kan daarna ook kom.

3. Hoe kan ek gedoop word met die Heilige Gees?

Deur geloof alleen (**Gal.3:2,5**), maar dan ook as iemand saam met my bid. **Hand.8:17** - “Hulle (die apostels) het hul toe die hande opgelê, en hulle het die Heilige Gees ontvang”. (Vergelyk **Hand.19: 6**). `n Gesalfde kneg van God kan saam met jou bid en sy hande op jou lê.

Luk.11:13 – “As julle dan wat sleg is, weet om goeie gawes aan julle kinders te gee, hoeveel te meer sal die hemelse Vader die Heilige Gees gee AAN DIE WAT HOM BID?” Jy kan dus self bid vir die doping met die Heilige Gees en gelowig daarvoor wag op die Here (**Hand.1:4,5; 2:1-4**).

4. Watter voorwaardes is daar waaraan ek moet voldoen, voordat ek die Heilige Gees kan ontvang?

Hand.2:38 - Ek moet my bekeer en laat doop.

Alhoewel God iemand kan doop met Sy Heilige Gees nog voordat hy in water gedoop is. (Hand.10:44-48).

Hand.8:21 - My hart moet reg wees voor God.

Hand.5:32 - Ek moet gehoorsaam wees aan God.

Gal.3:2,5,13,14 - Ek moet deur die geloof die Heilige Gees ontvang in my lewe. Soos wat ek Jesus in die geloof aangeneem het, só ontvang ons die Heilige Gees in geloof.

5. Waarom is die doping met die Heilige Gees nodig?

Matt.10:19,20 - “Maar wanneer hulle jul oorlewer, moenie julle kwel oor hoe of wat julle sal spreek nie; want dit sal julle in daardie uur gegee word wat julle moet spreek; want dit is nie julle wat spreek nie, maar die Gees van julle Vader wat in julle spreek”.

In tye van nood wanneer ons as kind van God onself moet verdedig, sal die Heilige Gees ons die woorde gee om te spreek.

(Vergelyk ook Mark.13:11).

Joh.6:63 - “Dit is die Gees wat lewend maak, die vlees is van geen nut nie; die woorde wat Ek tot julle spreek, is gees en is lewe”. As ons na gees en lewe verlang, het ons die Heilige Gees nodig in ons lewens. **(Vergelyk ook 2 Kor.3:6)**. Verlang jy na 'n opwekking in jou gees? Begeer dan die volheid van God se Gees.

Joh.15:26 - “Maar as die Trooster gekom het wat Ek vir julle van die Vader sal stuur, die Gees van die waarheid wat van die Vader uitgaan, sal Hy van My getuig”. **(Vergelyk ook Joh.14:26)**.

Die Heilige Gees sal ons leer en ook Jesus in en deur ons verheerlik.

Joh.16:13 - “Maar wanneer Hy gekom het, die Gees van die waarheid, sal Hy julle in die hele waarheid lei; want Hy sal nie uit Homself spreek nie, maar alles wat Hy hoor, sal Hy spreek en die toekomstige dinge aan julle verkondig”.

Ons het die Heilige Gees nodig om ons te lei in die hele waarheid.

Hand.1:8 - “maar julle sal krag ontvang wanneer die Heilige Gees oor julle kom, en julle sal my getuies wees in Jerusalem sowel as in die hele Judea en Samaria en tot aan die uiterste van die aarde”.

Die doping met die Heilige Gees gee krag om te getuig.

As gelowiges moet ons getuies vir Jesus wees, daarom het ons die volheid van die Heilige Gees nodig in ons lewens.

Rom.8:16 - “Die Gees self getuig saam met ons gees dat ons kinders van God is”.

Die teenwoordigheid van die Gees van God in ons lewens gee ons daardie absolute sekerheid dat ons aan Hom behoort.

Rom.8:26 - “En net so kom ook die Gees ons swakhede te hulp, want ons weet nie reg wat ons moet bid nie, maar die Gees self tree vir ons in met onuitspreeklike sugtinge”.

Ons het die Heilige Gees nodig om ons te help bid.

Jy sal agter kom dat daar dae sal kom dat jy nie genoeg vir God kan sê deur jou verstand nie. Dit is dan dat Sy Gees intree en ons help om te bid.

6. **Waarom is tale so belangrik?**

- a) Jy spreek DIREK tot God **(I Kor. 14:2)**
- b) Jy spreek deur die Gees VERBORGENHEDE **(1 Kor.14:2)**
- c) Wanneer jy in tale bid, STIG jy jouself **(1 Kor.14:4)**
- c) Wanneer jy in tale bid, bid jy nie met jou verstand nie, maar met JOU GEES **(1 Kor.14:14)**
- e) Jy kan God AANBID deur in tale te bid **(Hand.10:46)**.
Dit vorm dus `n nuwe dimensie van aanbidding.